

共同經課 - 1 使徒行傳十章三十四節~四十三節

34 彼得開嘴，講，Ta<sup>n</sup> 我真正知上帝無用外貌取人；35 獨獨 tī ták 邦國見有敬畏伊來行義 ê 人，hō伊歡喜接納。36 上帝所寄 hō以色列 kia<sup>n</sup> 孫 ê 話，tùi 耶穌基督來傳和平 ê 福音，(伊是萬有 ê 主)，37 chit-ê 消息 lín 知是 tī 約翰所傳 ê 洗禮以後，tùi 加利利起到遍猶太；38 就是拿撒勒人耶穌，上帝有怎樣用聖神 kap 才能抹伊；伊就四界行做好事，醫好見若魔鬼所壓制 ê；因為上帝 kap 伊 tī-teh。39 見若伊 tī 猶太人 ê 地方 kap 耶路撒冷所行 ê，阮做干證；人就吊伊 tī 柴裡，來害死伊。40 到第三日，上帝 hō伊 koh 活，續出現，41 m̄是 hō眾百姓看，是 hō上帝事先所揀選為 tiòh 伊做干證 ê 人看，就是阮 chiah-ê，tī 伊 tùi 死人中 koh 活 ê 了後 kap 伊 sa<sup>n</sup>-kap lim 食 ê 人。42 伊 koh 命令阮傳 hō百姓，干證 chit-ê 是上帝所立定做活人死人 ê 審判司。43 眾先知亦為 tiòh 伊做干證，就是凡若信伊 ê 人，tùi 伊 ê 名得 tiòh 罪赦。

共同經課 - 2 詩篇一百一十八篇一節~二節，十四節~二十四節

1 Lín tiòh 感謝耶和華，因為伊是好；因為伊 ê 慈愛永遠 tī-teh。2 願以色列講，伊 ê 慈愛永遠 tī-teh。14 耶和華是我 e 氣力，是我 e 詩歌；伊亦成做拯救我 e。15 Tī 義人 e 布棚內有歡喜 e 聲，拯救 e 聲；耶和華 e chià<sup>n</sup> 手施出大權能。16 耶和華 e chià<sup>n</sup> 手 kià<sup>n</sup> 高；耶和華 e chià<sup>n</sup> 手施出大權能。17 我 boē 致到死，iáu 能活 teh；續 beh 報揚耶和華 e 所做。18 耶和華 bat 嚴嚴警戒我；總是未有將我交 tī 死無。19 Tiòh kā 我開義 e 門；我 beh 入去，感謝耶和華。20 這是耶和華 e 門，義 e 人 beh 入去。21 我 beh 感謝你，因為你已經應我；Koh 成做拯救我 e。22 師傅所棄 sak e 石，已經成做厝角頭 e 石。23 這是耶和華所做 e，咱 e 目矚看伊做奇怪。24 這是耶和華所定 tiòh ê 日；咱 tī chit 日 e 中間 beh 歡喜快樂。

共同經課 - 3 哥林多前書十五章十九節~二十六節

19 咱若 kan-ta 在生有 òng 望 tī 基督，就 tī 眾人中咱是第一可憐 ê。20 總是 ta<sup>n</sup> 基督已經 tùi 死人中 koh 活，做 chiah-ê teh 暈 ê 頭一個 koh 活 ê。21 因為既然 tùi 一人 chiah 有死，也 tùi 一人 chiah 有死人 ê koh 活。22 因為親像 tī 亞當眾人 lóng 死，也親像 án-ni tī 基督眾人 beh 得 tiòh koh 活。23 但是 tak-ê 照伊 ê 次序；頭一個是基督，第二是 hiah-ê 屬基督 ê，tī 伊臨到 ê 時。24 然後末期到，就是伊已經廢無 lóng 總 ê 政治，lóng 總 ê 權柄 kap 才能，將國交 hō 父上帝 ê 時；25 因為伊的確做王，到 hē lóng 總 ê 對敵 tī 伊 ê 腳下。26 第一路尾受廢無 ê 對敵，就是死。

共同經課 - 4 約翰福音二十章一節~十八節

1 七日 ê 頭一日，清早，天 iáu-bē 光，Boát-tāi-liáp ê 馬利亞到墓，看見石已經 tùi 墓徙開。2 就走去就近西門彼得，kap 別個學生，就是耶穌所疼 hit-ê，kā in 講，有人將主移出墓，阮 m̄知 hē tī tá-lòh。3 所以彼得 kap hit-ê 別個學生出去到墓。4 兩人平平走；hit-ê 別個學生走做頭，比彼得 khah 緊，事先到墓；5 à<sup>n</sup> 落看墓內，看見幼苧布 hē-teh；獨獨無入去。6 西門彼得 tè 後到，入墓；看見幼苧布 hē-teh，7 koh 看見包頭殼 ê 巾，無 kap 幼苧布做一位，是另外 tī 一所在捲 teh。8 Hit 時 hit-ê 事先到墓 ê 學生亦入去，看見就信。9 因為 in iáu-bē 明白聖經 ê 話，講伊的確 tiòh tùi 死人中 koh 活。10 Tùi án-ni，兩個學生 tò 去家己 ê 家。11 獨獨馬利亞 khiā tī 墓外 teh 啼哭；哭 ê 時，à<sup>n</sup> 落看墓內；12 看見兩個天使穿白衫，坐 tī 耶穌 ê 身屍所 bat 安置 ê 所在，一個 tī 頭，一個 tī 腳。13 In 就 kā 伊講，婦人人 ah，啥事哭？應伊講，因為人將我 ê 主移去，我 m̄知 hē 伊 tī 甚麼所在。14 已經講 chiah-ê 話，就翻身 òng 後面，看見耶穌 teh khiā，也 m̄知伊是耶穌。15 耶穌 kā 伊講，婦人人 ah，啥事啼哭？你 chhē chī-chūi？馬利亞 phah 算伊是顧園 ê，就 kā 伊講，頭家 ah，你若有扛伊去，請 kā 我講 hē 伊 tī 甚麼所在，我就去收伊。16 耶穌 kā 伊講，馬利亞 ah。伊就 oát-tng 身，用希伯來 ê 話 kā 伊講，Liáp-pho-ni；意思就是，先生。17 耶穌 kā 伊講，莫得摸我；因為我 iáu-bē 上去見父；你 tiòh 去 chhē 我 ê 兄弟 kā in 講，我上去見我 ê 父，亦是 lín ê 父；見我 ê 上帝，亦是 lín ê 上帝。18 抹大拉 ê 馬利亞就去 kā 學生講，我已經看見主；koh 講，主用 chiah-ê 話 kā 伊講。

共同經課 - 4 路加福音二十四章一節~十二節

1 七日 ê 頭一日，天 phú 光，hiah-ê 婦人人帶所備辦 hiah-ê 香料到墓；2 看見石已經 tùi 墓門 kō 開。3 就入去，無看見主 ê 身屍。4 為 tiòh án-ni teh 躊躇 ê 時，忽然有兩人 khiā tī in 身邊，衣裳光 nà-nà。5 婦人人驚惶，面 à<sup>n</sup> 落地；hit 兩人 kā in 講，啥事 tī 死人中 chhē 活人 ah？6 伊無 tī chia，已經 koh 活。Lín tiòh 記得伊 iáu tī 加利利 ê 時有怎樣 kā lín 講，7 人子的確 tiòh 交 tī 罪人 ê 手，hō in 釘 tī 十字架，第三日 koh 活。8 In 就記得伊 ê 話。9 tùi 墓裡 tò 去，將 chiah-ê 事 lóng 報 hō 十一個學生 kap 其餘 ê 眾人知。10 去 tùi 使徒講 chiah-ê tai-chi ê，就是 Boát-tāi-liáp ê 馬利亞，kap Iok-a-ná，kap 雅各 ê 老母馬利亞，以及其餘 kap in 做伴 ê 婦人人。11 使徒看 hiah-ê 話做無影，也 m̄信伊，12 但是彼得起來走到墓裡，à<sup>n</sup> 落去看，只有看見幼苧布 nā-tiā<sup>n</sup>；就 tò 去 in 厝，teh 奇怪所經過 ê 事。